

毘陵集



毘陵集卷九

宋

張

守

撰

內制

賜江南安撫大使呂頤浩詔

卿以元勳舊弼出殿大藩姦宄亂常提師薄伐冒犯鋒鏑跋履山川雖未收斬將搴旗之功亦可見推軀徇國之誼方時艱棘寒氣滋隆次舍之間節宣是慎今遣中使賜卿銀合茶藥想宜知悉

賜呂頤浩乞宮觀不允詔

省所奏乞宮觀事卿出偃外藩力捍狂寇臥護諸將蔽
遮行朝隱然長城中外倚重忽覽來奏引疾丐閒雖高
沖退之懷殊拂倚毗之意今諸將進兵鏖擊軍聲已張
精神折衝政有資于元老藥石自輔其務究于遠猷協
濟多艱毋復有請所乞不允

又

省所奏乞宮祠事具悉比者李成越境南渡抗逆王師
有吞噬江左之心卿以舊弼臥護諸將扼其奔衝使諸
將盡銳征討克復郡縣而賊不敢出一騎以窺饒信行

朝恃以無恐者卿之功也朕方倚毗共滅此賊露章引
疾殊拂朕聞朕之待卿自謂無媿至于兵將分合務濟
事機非關重輕殆不得已諒卿體國必悉朕懷卿宜少
安厥次勉卒乃功以稱朕始終眷遇之意勿復有請

又

朕以卿勲舊委卿江南所賴精神折衝儀刑百辟亦非
專以吏事責卿向聞移疾求去數遣使輶手筆開諭至
于再三朕之待卿盡矣比覽來奏猶未視事欲遂前請
何未體朕眷委之意也以卿平日志不辭難乃貽避事

之譏忠以享上而蹈慢命之戒朕竊爲卿惜之況今寇攘未除防秋在邇遠近百執宜惜寸陰卿爲大臣與國同體而必欲求去何以責將士之用命率臣庶以赴功朕顧江南非卿誰可卿雖力請朕志不移今遣內侍某撫問候卿視事訖奏卿宜深諒勿復有辭

賜呂頤浩詔

卿以元辛出敵潘州慨然帥師援九江之圍引義竭誠不擇劇易比覽捷報已收奇功斬馘執俘前後非一戰艦旗鼓獲致亦多緬想忠勞良極嘉歎輔臣奏卿出入

行間衝冒風雨稍愆調護尤用惻然今專遣內侍撫問仍賜卿馬一匹并鍍金銀鞍轡一副至可領也

賜浙東制置使張俊詔

朕比委卿提重兵制置兩浙事宜本圖數日間與卿會于明州今聞明州錢糧空乏豈能聚兵又聞敵人或由常州或由宣徽或由衢婺以犯越州設謀措意專在朕躬若失浙邦朕將焉避中夜思念寢食靡寧今已委郭仲荀辛企宗同力捍禦惟卿忠勇事朕累年共嘗險艱備著勞效昨者提兵勤王定計復辟朕非卿則倡義誰

先卿舍朕則前功俱棄君臣之際休戚是同今則水陸道窮宗社危甚卿宜協謀戮力共捍賊兵若能破敵保我越邦當加王爵以酬忠蓋卿宜深悉朕不食言

又

朕自艱難以來竭國帑以養士捐好爵以勸功緩急之際鮮復爲用或望風畏怯或臨敵奔潰朕甚悼之今者敵騎遽犯浙東朕方避地海隅遠邇震懼卿獨奮忠誼請留明州秣馬厲兵爲決戰計刻章來上三軍賈勇載觀志畫良極歎嘉比聞敵遣偏師止數百輩涉遠勞敝

勢宜易圖卿以精甲十倍阻險迎擊必可萬全朕有不次之賞以待卿下及將士次第褒擢更宜申嚴紀律毋致侵擾官私惟卿腹心之將朕所倚毗必副眷懷寧俟多訓故茲示諭想宜知悉

賜兩浙制置使韓世忠詔

邇者金人南渡遽陷建康復遣偏師徑趨杭越朕以宗社之重暫避其鋒然念敵人勞師深入冒犯阻險殘暴無厭殆天亡之時也比在會稽呂頤浩獻議欲會京口邀截歸路以爲永圖方須卿來講究利害遽覽來奏及

圖上方略實契朕懷惟卿忠憤之誠謀慮之審千里之外不謀而同載觀規圖深所嘉歎倘能投機一戰取勝則中興宋祚惟卿之功不次之賞朕不敢靳凡獲賊所有資財玉帛盡予將士已令降空名告劄二百道用資激賞及助軍需勉踐爾言以副期待故茲詔示想宜知悉

又

卿比統率舟師邀擊敵寇忠勇之節遠近所聞相距大江殆將兩月殺傷莫計俘馘良多茲捷奏之屢聞嘉茂

勲之鮮儷豈謂濟師之失援致隳定亂之全功然成敗者天理之難知而勝負亦兵家之常事度尙所亡之少少豈足介懷淮陰益辨于多多尚觀來效卿其撫傷痍之衆上俘馘之功以及戰亡竝當賞賚今差內侍某前去撫問如欲便赴行在卽仰疾速起發前來或且駐師江陰休養士卒卽令下戶部行下所屬應副錢糧故茲示諭想宜知悉

賜福建制置使辛企宗詔

朕眷七閩險遠瘠薄俗旣纖嗇以趨利間多椎剽而爲

奸州縣之吏初既失于拊循盜賊之萌又復稽于彈戢
馴致紛擾莫獲莫居朕比委卿制置一路入境問俗不
憚險艱折馘執俘洵聞勝捷士卒之氣既振姦宄之鋒
自摧緬想忠勤良極嘉歎益翦除于黨類期綏靖千里
閭訖其外庸竚有褒陟故茲示諭想宜知悉

賜陝西宣撫處置使張浚詔

金人去冬兩路深入南蹂洪撫以至筠袁東陷昇杭以
及明越朕以宗社至重父兄未遠遠避敵鋒圖保基緒
而我將士懷積年憤鬱之志乘驕敵勞敝之師各輸厥

忠人自爲怒張俊迎戰于鄞水劉光世邀擊于江西周
望以大軍控禦于嘉禾趙立擁義旅驅攘于淮甸捷書
日報俘馘踵來敵人挫傷前所未有爰念旣得地利之
險以保江浙兼亦因天時之便以規河山惟卿忠翊朕
躬勲在王室宣風邊徼備著勤勞宜屬壯猷共恢遠略
蓋聞敵人用兵深忌暑月要卽騎卒解甲弛鞞之際稍
資秦兵投石超距之餘于五月間徑擣巢窟一由同州
渡渭以取蒲解一由鄜延界渡河以取晉隰俯從戰勝
百倍之氣仰符前王六月之征用我計之未嘗出敵人

之不意竊謂一舉可圖萬全卿宜審度事機益深籌慮
勉卒賢業無規近功庶幾盡復兩河迎還二聖以底中
興之烈豈不偉歟

又

朕以疆場多虞風塵未靜東巡江左倏已逾年西顧秦
中邈焉萬里念王靈之阻闕將使指以宣風卿位冠樞
衡勲昭社稷挺忠精之特操早被簡知秉經濟之遠猷
靡辭煩劇曩疇咨而臨遣獨慷慨以請行載涉炎涼備
宣忠力蒐卒補乘既大振于軍聲摘伏發奸復少蘇于

民瘼每閱封章之上具形憂國之誠爰遣使輅往宣德
意載念高秋在候殘敵未還恐尚肆于貪謀蓋有資于
外援宜提勁旅豫控上流諒惟心德之同必體國家之
急朕所倚重寧煩訓辭故茲親筆示諭想宜知悉

又

卿宣威關陝備著忠勞遣將出師屢聞勝捷昨得七月
奏已復鄜延一路及京兆府等載觀規畫良極歎嘉仍
期八月進兵圖取蒲解自是之後音驛不聞夙夜惟念
頗深西顧之憂蓋聞金人會兵進銳以窺陝右深恐萬

一或墮敵計更宜珍重以收全功今朕留會稽沿江捍禦頗嚴淮甸敵人不敵南渡但江南諸盜未靜已遣張俊同池帥呂頤浩悉力翦除皆不足慮計卿欲知因令密院遣人問卿動息軍事曲折可悉以聞

又

斬趙哲待罪

比聞金人糾合重兵力圖關陝惟卿倚重寬我顧憂雖提五路之全師乃當百戰之勅敵非賞罰信號令明不撓不疑鮮克有濟邇來縱敵玩寇驕惰成風卿能明節制之權正逗撓之律罰一勸百孰謂不然引咎露章益

見忠謹況乃一勝一負兵家之常所亡不多無足介意更圖後舉以收全功其堅乃心益務持重庶幾盡復境土以成中興之烈朕之所望也所待罪放想宜知悉

又

朕眷關中天下根本卿將使指爲朕遠行載涉歲華具宣忠力自得去年九月所上章尋降親筆放罪去訖比覽呂頤浩奏謂卿失利之後退保興州欲取問道至熙河點兵以圖再舉朕復聞此宵旰增憂重以山川阻脩道路榛梗音驛不至已踰半年機事之間難于逾度復

項家達校

念自古成敗不可必期卿宜審量事機擇利而處敵人
 既悉重兵以窺秦蜀而我師挫傷之餘或未能長驅而
 深入也第宜謹守關塞益務持重儻或牽制狂敵不能
 南侵則亦惟卿之功當忍小忿徐為後圖近者李成跳
 梁剽殘江南數州已委呂頤浩張俊倚角進兵大獲勝
 捷想此逆賊不日剷除而淮甸殘敵亦稍引去諒卿聞
 之當亦少寬憂國之意人回宜悉具彼中事宜曲折一

一聞奏

良也又

比得卿三月四日奏待罪及乞選委重臣鎮撫關陝事
 具悉卿宣風陝服久著忠勤失地喪師頗增憂顧夫敵
 以乘勝不可當之鋒我以新集不素練之卒眾寡堅脆
 固不可侔欲一戰以收功豈萬全之可必天未悔禍既
 往莫追然敵人既得志于三秦必垂涎于全蜀而又南
 牧之寇尚頓淮揚則吞噬江左之心猶未已也卿宜收
 合煖散養銳待時但能據險堅壁謹守要害既以保固
 四川之地又能牽制南下之師則亦惟卿之功兵忿者
 亡古人所戒毋疾戰以規近利毋深入以蹈覆車益遠

乃猷毋忽朕命相去萬里音驛罕通次舍之間更宜尙
慎所待罪放免

浙西親征詔

朕念中原之微弱憤強敵之憑陵固嘗屈己以請和尙
復阻兵而肆虐比由海徼還次越邦赤子流離殆失耕
桑之候聚廬焚蕩盡爲瓦礫之場咎在朕躬禍貽爾衆
幸民心之未替知天命之攸歸然而殘寇尙假息于江
壘潰卒復肆行于近境坐念傷痛詎容懷安是思晉文
桑下之謀遠跡漢高馬上之略斥嬪御膳羞之奉躬鞏

馬甲冑之勞董率六師巡行列部旣欲撫綏于凋瘵又
將彈戢于姦偷庶幾消弭禍災圖回基緒尙賴朝廷將
士州縣吏民戮力奉公忘家徇國各務殫于忠赤用弘
濟于艱難朕以四月某日巡幸浙西所有六官百司竝
留越州

賜門下詔

朕顧德弗類遭時多虞臨民馭朽索之危涉道濟巨川
之遠向者敵師深入國步載艱永惟責躬避位之圖專
爲講好息兵之計力祈大國冀迎二聖以遣歸庶保丕

基可致四方之綏靜今則奉太母之慈訓念嗣君之幼
冲致兵民推戴之誠諭內外請祈之切謂防秋在適當
愛日以有爲謂遣使出疆恐尋盟而未遂露章仰至復
辟爲期朕以太后之旨不敢違羣下之情不可卻遜辭
靡獲任重難堪仰太母之慈仁許同聽斷肆眚躬之寡
昧敢憚憂勤朕惟東朝有垂簾保佑之勞元子有踐阼
纂承之託上徽稱于長樂以致四海之歡正冢祠于青
宮以繫萬民之望式頒溫詔誕告多方嗚呼有臣三千
實倚同心之助卜年七百復開過歷之期更資中外之

交修庶格神天之協佑咨爾有衆咸體至懷太后宜上
尊號曰隆祐皇太后令有司擇日奏請嗣君宜立爲皇
太子令有司擇日備禮冊命施行所有三月六日赦書
應干恩賞等事有司疾速施行如有稽違重寘典刑故
茲詔示想宜知悉

又

朕遭時艱危兩宮北狩實賴隆祐皇太后母儀天下保
佑朕躬非德寡祐奄臻禍變伏讀遺誥貶降禮儀固宜
仰遵慈仁之訓爰念太上皇帝繼統于哲宗靖康垂簾

授位于冲眇中更苗劉之變尤高社稷之功雖正隆名未極大養非盡尊崇之典曷昭仰報之誠隆祐皇太后應于典禮可比擬欽聖憲肅皇后故事令有司討論詳定以聞朕以繼體之重當從重服以稱孝思之意故茲詔示想宜知悉

又

朕惟隆祐皇太后坤儀如昨敢奉有期永懷夫保佑之功務極其哀榮之典爰念蒙垢于紹聖之末卽瑤華而退居復位于上皇之初實欽聖之慈旨屬姦諛之當制

乃隱沒而不言未洗謗傷久淹歲月肆朕纂紹逢時艱難雖正隆名未伸褒冊將卽廟庭而登配豈容典禮之久稽用詔攸司載加追賁可令禮部太常寺討論合行冊禮及奏告天地宗廟等事申尙書省

太后賜門下詔

敕門下以公滅私者哲王之明訓右賢左戚者治世之遠圖吾以寡昧之資際艱難之運永惟付託之重寧辭保佑之勞聽政垂簾非眇躬之得已遭時多壘豈故事之敢遵已裁御府之膳羞仍損家庭之恩數靡敢伸于

私諱恐涉僭踰復申勅于本宗以防干撓乃掌兵于內
外或庀職于朝廷事屬嫌疑理宜避免克自抑畏期感
格于天心始于憂勤庶緝熙于治道咨爾有衆咸體至
懷除膳羞已裁減外其因垂簾應干恩數痛行減省故
事當諱父名亦更不避以稱吾恭己抑畏之意本宗子
弟已降詔旨不任要職不于私第見宰執不干于朝政
可令今後不得任內外掌兵官及在京并行闕職事官
忠厚見提舉巡幸一行事務亦罷故茲詔示想宜知悉
賜中書侍郎王孝迪赴闕詔

敕孝迪朕遭時艱危宵旰求治實賴左右前後協恭戮
力以圖康功卿譽望才猷簡于朕志圖任共政時惟舊
人召還廟堂允資經濟固宜朝聞命夕引道也倚注滋
久未聞造朝其悉大臣體國之誠無徇匹夫小廉之節
亟祇新命以副虛懷已除卿中書侍郎詔書到日卿星
夜起發前來赴行闕不得更有辭免故茲詔示想宜知
悉春暄卿比平安好遣書指不多及

賜浙西安撫大使劉光世詔

承州殘敵攻圍山陽諸鎮之師逗撓不進以卿任兼將

相勲望特隆已卽指揮並聽節制比見探報王師若柵皆在高郵之南去楚尚遠勢不相及深慮淹久致失事機唇亡之憂于卿爲重宜速渡大江以身督戰庶使諸鎮用命戮力盡忠亟解山陽之圍一掃垂盡之敵朕亦議遣大軍以爲卿援諒卿體國必悉朕懷

賜張浚特進學士院詔

浚躬率將士列屯兩淮以至經理上流皆中機會邇者逆賊擁衆深入蹂踐淮西浚親臨大江以身督戰將士賈勇一擲無遺而襄漢之間捷書屢上勲勞顯著深用

歎嘉宜有褒陞以勸列位

賜江南西路安撫大使朱勝非詔

朕比裂江北之地分置鎮撫以捍外寇眷惟江南密邇行在復擇勲望之臣建三大帥所賴心德惟一精神折衝稽之公言蔽自朕志卿惟舊弼朕所眷知九江上流倚卿爲重意其朝聞命夕引道也抗章遜避殊拂朕懷朕以艱難累歲夙夜究圖小大之臣所宜戮力呂頤浩劉光世皆以復辟之勲當一面之重授任而往罔敢憚行庶幾公忠表倡列位卿其體國勿復固辭除已令學

士院降詔并遣使撫問外故茲親筆宜悉朕懷

又

朕建三大帥控臨兩淮率用勲德大臣以隆方面之寄
卿惟故相朕所眷知昇卿九江選任實重除命之下已
淹歲時猶未奉詔之藩褻帷視事彈章累上謂朕失刑
命令儻或廢于大臣法度豈復申于百執朕亦恐道塗
尚梗或致愆期而典憲遽加有傷體貌益思全度務極
始終卿宜念九江收復之初百姓凋弊之極即日引道
往見吏民拊摩瘡痍招輯流冗不獨追卿適慢之責亦

得以副朕勤恤之心毋復稽留重招物議故茲詔示其
體至懷

賜威武大將軍曲端詔

朕遭時多艱移蹕暫避眷關中阻山帶河之勢爲天下
勁兵健馬之區捍我邊虞倚時將略邈在遐外惕然顧
懷曩臨遣于樞臣俾昭宣于德意惟卿姿稟沈毅世篤
忠勲久提貔虎之師式著疆場之略比覽行臺之近奏
益知分閫之賢勞已建殊名俾護諸將旁兼制于五路
外折衝于二邊用彰推轂之誠復峻廉車之秩寵嘉特

項家達校

異眷倚可知庶圖展盡于猷為豈復致疑于讒間朕念
隆上都而觀萬國孰踰關陝之雄得猛士以守四方遠
相韓彭之烈其體朕志無媿前修

賜孔彥舟詔

汝頃事朕藩邸具知忠勤從軍累年頗著勞績比聞提
兵遽入湖南公肆侵擾遠近驚疑以謂汝有攀附之恩
亦復如此為天下笑朕為汝惜之諒因軍兵闕糧非汝
本意昨已除汝正任觀察使湖南副總管想已祇受今
聞李成遣馬進攻圍江州江南大擾呂頤浩已統萬人

問罪朕以行在防秋未欲繼發大兵汝可統率部曲解
圍江州併力以討馬進候剿除淨盡入覲行在不特以
功贖過朕當以節度使授卿勉立大功務全終始故茲
親筆宜悉朕懷

賜浙東宣撫副使郭仲荀詔

朕以金人渡江移幸旁郡委卿宣撫浙部統率將士以
捍強敵始欲俟朕駐蹕明州期卿等來今會到錢穀數
極微少深憂乏絕以飢我師而又探聞敵師已圍建康
分兵山常或宣徽或衢婺以窺會稽則區區之意專在

項家達校

朕躬又思敵人雖強勞師遠襲已非所利而況吳越阻
 山帶江地皆沮洳道徑隘狹得地之利于茲為多若以
 逸待勞以少擊眾資卿忠智誠非所難又思國家艱難
 以來裁損百費竭力養兵若俟緩急以保衛為名不復
 接戰已非本意而又君臣聚首竄身海隅縱獲生存豈
 不有媿朕中夜思念寢食靡遑今卿與張浚辛企宗有
 甲兵二萬并李鄴所聚民兵亦約萬人西阻濤江南依
 山險以此眾戰誰能禦之卿宜審思以身督戰大將以
 下有不用命當以軍法從事俟卿戰退大敵功狀來上

卽除卿同知樞密院事故茲親筆卿宜知悉

賜嚴州柳約詔

金人入寇遽犯臨安復遣偏師遠及明越朕方避地遵
 海而南將士惰驕鮮復用命卿守偏邦慨然請行欲與
 諸郡合從克復吳會比覽來文良用嘉歎今張俊在明
 州已聞捷報韓世忠全軍在樵李杜充在儀真各圖邀
 擊已令周望遣陳思恭統兵前去收復臨安卿更審量
 事宜統率將士土豪以決進討如不可躬行卽選將官
 前去候立功績當不次褒擢其餘將士土豪等第推恩

故茲親筆想宜知悉

賜新除端明殿學士同簽書樞密院事鄭穀辭免
恩命不允詔

救鄭穀省所奏辭免恩命事具悉朕纂承丕緒蒙訓東
朝國步多艱允賴股肱之力邊陲制勝尤先帷幄之籌
博選人豪俾參兵柄卿純心許國厚德鎮時諫垣多補
過之規憲府著摧剛之節直而不撓屹砥柱于中流行
其所知灼元龜之先見已信顧言之行兼圖濟武之文
宜密贊于樞機亟延登于廊廟允符公望何事撝謙往

卽官常毋替朕命所請宜不允故茲詔示想宜知悉

賜新除端明殿學士同簽書樞密院事李邴辭免
恩命不允詔

救李邴省所奏辭免恩命事具悉朕以寡昧屬茲艱虞
內侮外陵國有阽危之勢將驕卒惰人無賈勇之心顧
經世之鴻才付本兵之重寄卿器姿閎達問學淵深粲
然華國之文藉甚映時之望復登鼇禁小心蓋得于鄭
綱肆演綸言大手每煩于德裕已賴揮毫之助更資借
箸之謀入贊鴻樞實諧清議曷過形于奏牘欲懇避于

恩章往卽欽承體茲眷待所請宜不允故茲詔示想宜知悉

賜新除戶部尚書孫覲辭免恩命不允詔

敕孫覲省所奏劄子辭免戶部尚書恩命事具悉文學政事昔爲兩科文學之士患于虛浮而無實用政事之才患于固陋而無遠謀求其兼全付以劇任卿以文學則博通古今而有可用之實以政事則練達利害而有經遠之謀惟時地官實總國用制多寡之數以節其出入幹盈虛之權以通其有無卿蓋優爲何足遜避惟長

與貳事任略同循次而遷公議僉穆亟祇成命務體眷懷所請宜不允故茲詔示想宜知悉

賜新除翰林院學士李邴辭免恩命不允詔

敕李邴省所奏辭免恩命具悉朕惟纂承大統雖有事于戎昭鼓動多方亦莫先于文告簡求雋老寓直禁林卿學探本原文參經緯發揮七制曩聞黃絹之詞流落兩朝宜復青氈之舊仍竚論思之益豈專潤色之工成命旣頒公言胥穆寧煩沖挹亟體眷懷所請宜不允故茲詔示想宜知悉

賜右諫議大夫鄭穀乞待罪不允詔

敕鄭穀省所奏乞待罪事具悉比以強敵歲侵中原日削奄入淮甸駐蹕吳中引咎責躬以弭禍變卿以忠義之節譽謬之言宏益居多庸臣沮傷不悉聽用肆予寡昧方賴箴規屏居固辭非朕之志往安厥次益罄乃忠所辭宜不允故茲詔示想宜知悉

賜新除御史中丞鄭穀辭免恩命不允詔

敕鄭穀省所奏辭免恩命事具悉朕聞良藥有苦口之利明鑑無見疵之尤惟求讜言有補治道方竚告猷之

益式圖已試之功卿遠識造微純誠許國踐揚諫省箴規久著于青蒲擢長臺端彈擊竚觀于白簡宜亟殫于忠赤以弘濟于艱虞何執撝謙尚形遜避往祇成命益體眷懷所請宜不允故茲詔示想宜知悉

賜新除中書侍郎王孝迪辭免恩命不允詔

敕孝迪省所奏辭免恩命事具悉天下有緩急之勢君子有行藏之時上既求賢而圖濟于艱虞下思行道以自期于著見則君臣相得而治功可成卿望臨一時身兼數器顧予眇質允賴于交修惟爾舊人乃先于圖任

况茲國勢未振政本久虛何弗體于眷懷尙曲形于謙
挹亟踐厥次無復有辭所請宜不允故茲詔示想宜知
悉春暄卿比平安好遣書指不多及

賜新除徽猷閣待制康允之辭免恩命不允詔

敕允之省所奏劄子辭免恩命事具悉朕省方觀民錄
德定位式示臣工之勸豈容名器之私卿識慮精明風
力強敏壽春假守而羣偷辟易若長城之賢武林開
藩而千室晏安熏然慈父之政肆加詢攷備見忠勞可
無勸賞之公以慰借留之願賜金增秩頒漢室之璽書

簪筆持荷綴甘泉之法從增華使節允協師言何必撝
謙尚仍固避往祇成命亟體至懷所請宜不允故茲詔
示想宜知悉

賜資政殿學士葉夢得辭免知洪州恩命不允詔

敕夢得省所奏劄子辭免知洪州恩命事具悉朕惟才
能之士可與有爲而或失之輕道德之士可與有守而
或失之緩乃選于衆兼用所長卿學問深博而道德足
以鎮浮識慮精明而才能足以辨劇眷南昌之都會實
行闕之藩維輟吾重臣殿此南服惟鎮浮而不擾乃能

綏靖兵民惟辦劇而不勞乃能鎮服姦暴允穆清議寧
煩固辭式遄其行無替朕命所請宜不允故茲詔示想
宜知悉

賜淮南諸鎮詔

朕秉德弗類遭時多虞敵騎憑陵貪殘滋甚乘輿播越
艱險備嘗永懷祖宗積累之勤遠念父兄劫遷之難下
憫黎元之荼毒近傷井邑之陵夷跼地躋天痛心疾首
比旋師于江浙尚牧馬于淮堧靜言淹久之因復有窺
乘之意爰念肇分列鎮實控賊巢奮忠誼以致身必思

賈勇顧寇戎之在境諒已疚心矧盛夏之亢陽屬敵營
之解甲弓弩弛緩羣馬疲羸事亦易圖機不容失宜倡
齊公九合之義共成宣王六月之征擊其惰歸庶有符
于往志貴乎拙速當毋失于天時懋建非常之勲卽膺
不次之賞候詔書到日可會合諸鎮同共剿除淮甸金
人餘黨以成大功故茲親筆示諭想宜知悉

賜御營都統制辛企宗詔

朕比委卿于會稽固非得已始圖駐蹕馳驛召卿今聞
敵師之東專欲窺朕四明空乏無以聚兵朕之精兵皆

會吳越若不依地利之險阻作士氣以驅攘則君臣竄
身去將焉避中夜思念圖濟艱危已詔仲荀俊戮力協
謀以捍遠寇況聞分兵而來其徒必不衆多惟卿宗族
被遇累朝卿之忠嘉朕所體悉告辭之際屢布悃誠若
皆以入衛爲心則天下非朕所有卿宜體國家之急忘
位貌之殊賈勇爭先無致嫌隙賞罰之柄朕不敢私儻
有成功卽頒旄鉞示茲親筆朕不食言

明州奏捷賜詔

朕觀國家自金人入寇以來士氣沮喪莫敢撓其鋒者

今復遣輕兵深入四明卿賈勇先登以身督戰大獲勝
捷忠誼之節俘馘之功獨高一時載覽封章良極嘉歎
已令張公裕具海船二百隻前去以俟凱還更宜勉勵
以全大功毋使匹馬生還是所望于卿者懋功之賞朕
不敢私故茲親筆獎諭想宜知悉

陸門集

卷九

項家達校

崑陵集卷九

崑陵集卷十

宋 張不歸下守 撰

啟

賀范相公知溫州啟

伏審注想舊弼誕揚明綸起殿東南之邦稍孚中外之望惟大賢之出處繫一世之重輕雖辭榮避寵者前哲之高風而求舊念功者明君之先務況乃邊虞未靖方深仄席之憂人望所歸宜示賜環之漸恭惟某官學識足以貫古字量足以鎮浮發大策于賈誼之妙年登本

朝猶馬周之素宦大河喬嶽鍾此山川之靈寶鼎介圭
挺然邦國之鎮曩躋柄路旋正台司與時偕行密勿經
綸之業不可則止雍容進退之風久安綠野之居實繫
蒼生之望車輻暫偃聊借重于偏州鼎鉉正虛佇歸榮
于上宰某同升固久辱照尤深陪末議于政塗莫贊燮
調之術假餘光于鄰燭復親撫字之規念稍迫于桑榆
且久荒于松菊矧復支離之難強不堪倥偬之徒勞方
乞身力請于聖時期拭目永觀于賢業願言調護益副
瞻祈

回賀知福州曾尚書啓

伏審起從祠館就領价藩望實前孚已歎何來之暮教
條始布固將不令而行屏翰增隆搢紳胥慶恭惟某官
剛毅有立悃悞無華懿文足以潤色帝猷遠識足以經
綸庶務踐揚要劇藹著事功久從嶺海之游益注朝廷
之意惟是閩粵稍遠于行闕矧經寇虐之震驚猶爲東
南全盛之輿區故屬老成而臥治諒識鄭崇之革履卽
頒宣帝之璽書而某頃以非才亦嘗承乏近觀舊政故
慙播秣之前側聽輿言必誦無禰之昔尚賴匿瑕之大

德庶逃司敗之深文先辱賤勝第深銘感

回賀知揚州葉待制啓

伏審外庸旣著克宣疆場之威次對復陞誕布絲綸之寵藩垣增重紳笏交歡伏惟某官識慮敏明才猷秀傑學問由于世濟風績藹于民謠自結重旒之知凌厲持橐之選鑠金之口歎滄訛之交興匪石之心歷險夷而不貳比者捍窺乘之強敵撫凋瘵之餘民恩威竝行聲實兼茂宜還從列以慰公言歸僞境之侵疆更賴折衝之略致行朝之奠枕益隆夾輔之勲屬弭駕之云初拜

飛緘之遽及水遑贊喜先辱謙光欣感之誠敷宣罔旣

回賀知温州章尚書啓

伏審輟六卿之長干中臺牧千里之民于便郡褰帷視事擊壤騰歡恭惟某官學造精微氣涵剛大志節更險夷而不貳才術遇盤錯而有餘折狂悖之氣于危疑之時抗忠嘉之言于獻納之地張旛絕域自請終軍之纓返命行朝不棄蘇武之節益隆天眷進長地官方須柄用之榮遽得蕃宣之請惟義所在與時偕行識革履之聲豈容久外促鋒車之召竚聽來歸慙慶牘之未馳辱

榮函之先及靜言欣感曷究敷宣

賀朱相公除右僕射啓

伏審大廷敷號舊弼登庸徂望昭宣慰蒼生之傾屬同心翊戴扶黃屋以尊安中外歡愉華夷誓服竊以九重旰食軫國步之迍邐四海疚心歎人謀之回適急于赴功則攘臂以事兵力膠于應變則拱手以須天時類失厥中無益于治宜得魁壘豪傑之士以爲經綸康濟之圖人固患于難知政莫先于任舊恭惟某官學窮道奧識探幾先德度恢闓撓汪汪之陂而不濁才猷敏達游

吳鼎雯校

恢恢之刃而有餘曩警蹕之時巡倚鈞衡而爰立一德始熙于帝載兩兇遽亂于國經八柱承天卽正高明之位五龍夾日灼知潛授之功扶顛談笑之餘遠引江湖之上謗書一篋何傷丹展之深知紉札十行旋趣鋒車而入覲邇英晝訪宣室夜前衮衣繡裳旣喜歸于姬旦命圭相印復加禮于裴公固應展盡夫遠猷豈復規圖于近效裕民積粟以固邦本詎專兵力之強嘗膽枕戈以修政刑亦戒天時之變將見運籌帷幄以決勝于千里端委廟堂以爲準于百僚沃心清燕之閑拭目中興

之盛某頃陞從橐嘗蒙薦慰之私比解藩符復忝交承
之契仰止熒煌之座稱慶無階茶然衰病之蹤依歸有
所祇聞新拜喜倍常情

賀張知院除右僕射啓

恭審渙號大廷晉陞良弼宸衷簡注見考慎之得人國
勢尊榮知治安之有日竊以君臣相遇古今至難玩歲
愒日則必悔于墮臆趨事赴功則每虞于掣肘故時君
克斷裴度所以成功而朝議多違羊祜不能如意自非
天意悔禍人謀允臧則何能用大度之言予以啓中興

之運恭惟某官奇才命世遠畧濟時洗日咸池功素高
于社稷捫參蜀道名已振于蠻夷雖更夷險之殊不替
始終之遇屬傳羽檄趣駕鋒車復正位于樞機仍撫師
于疆場運籌帷幄而決勝于千里致敵騎之宵奔端委
廟堂而爲準于百僚副輿人之夙望實惟圖舊何止策
勲伊尹一德以享天心無間然矣漢高五載而成帝業
尚竊遲之益堅帶礪之盟增煥鼎鐘之勒某辱知最久
贊喜尤深聞海相從已熟衰殘之迹荆溪休老願諧起
縮之心頌詠之私名言罔旣

賀趙相公除左僕射啓

伏審決定大策建中興不拔之基褒賞元勳正上宰久
虛之位王庭孚號海宇交歡竊以赤舄袞衣美征東之
姬旦命圭相印答平蔡之裴公播在聲詩光于簡冊況
卻憑陵之巨敵有開恢復之宏規示丕勸于羣工宜首
膺于異數恭惟某官直方而不撓惇大而有容獻納論
思夙著排姦之節贊襄輔弼允高經遠之謀惟光武能
推赤心而絳侯可屬大事會羽書之遽至奉革輅以徂
征帥律一新坐據江山之險捷書屢上幾成京觀之封

致醜類之宵奔本嘉猷之辰告射雕賈勇雖多李廣之
無雙指獸收功誰出蕭何之第一宜頒宸綍首冠台躔
舍爵之賞旣行歸疆之期可待某逃聞誕告喜越常情
昔忝同升謬託金蘭之契老思自放願諧丘壑之求頌
詠之私敷宣莫究

回馬運使啓

伏審抗旌俯次于近封視印已從于刮目姦媮之吏聳
威望之前孚凋瘵之民跂寬條之下逮羣心相慶一路
所同伏惟某官智識高亮而詳練于事機才猷敏強而

緣飾以儒雅念江表瘡痍之未復繫淵衷宵旰之不忘
顧將上不乏于邦儲下少舒于民力類非文俗吏之所
能辦故屈老成人而不爲嫌某茶然衰病之蹤求去未
遂仰止旃幪之託爲幸滋多修慶牘而未遑辱榮函之
遽及感慙之至敷述奚周

代郡侯賀應運使啓

竊審榮拜宸綸就更使節允資心計上幹邦儲入境宣
風涓辰視事恭以某官機猷敏濟業履粹明出逢熙盛
之辰益茂經綸之志久茲詳試蔚有休稱寔膺睿哲之

簡求浮被光華之臨遣領均輸于淮甸已聞百室之盈
總轉漕于浙邦用充九年之蓄佇疇茂最入踐華資某
偶此叨恩鼎來假守稔聞德望適在鄭君之鄉行遂郊
迎聊繼蜀人之寵依仁竊幸稱慶無階歧詠攸深名言
罔喻

回賀郭少傅啓

伏審頒大廷之顯制進亞傅之崇資凡預觀瞻同深抃
蹈恭惟某官勲高列辟望著三朝入扈殿廬壯儀刑于
陛戟出分帥闡聳威譽于邊陲曩聞烽火之累傳屬仰

海邦之靜治介圭歸覲宜膺眷獎之隆孤棘陞華增重
蕃宣之寄某披瀝惟舊荷照尤深側聞綸綍之誕揚方
媿藤牋之獨後過蒙謙眷第極感銘

回江東三漕啓

叨膺宸旨俾鎮陪都揣分引辭方徹九重之聽飛文垂
慶蓋踰十部之賢深惟留鑰之司非曰養疴之地顧宦
情已矣老將至而止合投閒病骨枵然力旣憊而豈宜
任重此蓋某官誠心樂善屈己定交借妙語而陰辱推
揚先衆人而俯加勞問方頒諭詔少安衡宇之居莫敘

謝誠姑報珍函之寵感慙之至敷敘奚殫

福州到任謝宰執啓

起自三吳之故里游更兩越之名藩試用罔效委寄加
隆嫌于擇事不敢力陳疾病之身卽已到官于是具宣
寬大之詔惟七閩之巨鎮接五嶺之炎荒地狹而山谷
深民貧而風俗悍向由劇寇屢欲窺乘繼以大兵頻資
供億致公私之儲掃地加夏秋之旱流金不堪歎息愁
恨之聲宜有還定安集之政顧如某者心雖許國才不
適時進無補于謀謨退不堪于煩劇承流輔郡曾訟斲

之未清假寵經帷辱召環之遽及第緣衰茶屢控忱誠未奉命音更叨煩使此蓋伏遇某官才高而兼濟道大而容惠綏外服之民開濟中興之運念傷夷之凋郡當解煩苛故畀付于陳人使專牧養敢不鞭策駑鈍拊摩瘡痍儻正信之教興庶幾弭亂雖催科之政拙詎敢辭勞

再知紹興府到任謝宰執啓

觸熱之官諷辰視印在私良便仍昔所臨政拙心勞吏民習知其駑鈍頭童齒豁魚鳥亦怪其衰殘伏念某向

誤聖神之知徧更中外之任由寵榮之踰分致盈滿之挺災疾病相仍長恐膏肓之逼聰明不及益知醜髀之難顧共理之寄大懼于曠瘵而投閒之章屢關于聽覽旣不責其避事又復畀以便藩此蓋伏遇某官光輔聖時丕隆賢業威加有截收召公辟國之勲鈞播無私得伊尹格天之道欲拊循于凋瘵尤慎簡于循良遂致陳人復叨舊物適使輶之驟至乘帥闡之暫虛冥搜殆甚于察淵公取不嫌于竭澤方遠夷之猾夏當海徼之防秋而乃帑無宿儲吏罷月俸欲剥膚椎髓恐非仁政之

宜而折骨絕筋何補公家之急尚賴至明燭隱盛德包
荒惠以初終免于顛沛田廬在望少休抱疾之身溝壑
未填盡是報恩之日

轉官謝宰執啓

承流無補增秩爲榮洊懇避而弗諧終兢慙于非據伏
念某學既老而益落氣被病而逾衰誤膺分闕之求僅
弭弄兵之習兩年黽勉敢歎周南之滯留六沴侵陵真
作漳濱之沈痼數祈罷免少追曠瘼豈尙闕于俞音復
叨陞于顯秩賣刀買犢欣暫反于農疇求牧與芻媿數

關於朝聽顧撫字之心勞而催科之政拙功何有于絲
毫繫高明之位列而亭育之功全物率歸于陶冶此蓋
伏遇某官懋格天之賢業建辟國之遠猷約以待人故
每棄瑕而錄用醲于行賞將使趨事而赴功枯荻猥費
于霑濡老馬徒勞于鞭策上流甚重誠非臥治之時下
澤可乘終假投閒之便永惟未死之日期報不貲之恩

回賀湖州方侍郎啓

伏審光膺眷注榮領蕃宣公議稍伸輿情交慶恭惟某
官受才弘毅稟氣中和早貢讜言藉甚外臺之譽晚疇

賢望揚于法從之華一從祠館之游殊鬱搢紳之論起
臨輔郡作屏行朝佇還漢橐之持豈容孔席之暖某久
欽賢範欣覲除書屬弭駕之云初念慶函之未及遠貽
翰墨第極感銘

回賀常待制啟

伏審得請真祠暫諧雅志躋榮從橐稍慰公言恭以某
官學問見于躬行直諒由于世濟扶持國是共高譽謬
之風潤色帝猷不廢論思之益暫均勞于支郡實簡眷
于淵衷自厭風波有懷丘壑直西清之五閣仰觀出綽

之優覲北闕之九重行被賜環之寵某比因假道幸遂
披風屬稅駕之云初致賀賤之獨後先蒙翰墨第劇感
銘

謝翟給事舉改官啟

竊祿鼎來未能暖席挾章甚寵實慰窮途佩德不貲寄
顏無所竊以賢否異趣迹每混于淄澠貴賤相求勢實
侔于胡越疑似之迹則每難于必見邈絕之勢則不能
以自通故有公卿不揖客之譏英俊沈下僚之歎惟識
解超世則賢否之淄澠相絕于千里以人物爲心則貴

賤之胡越不間于一毫用能得真材于稠人之中卓然
振高義于流俗之外如某者愚無一得窮有百罹襲科
舉腐儒之常談無經術高世之遠見謀及親之三釜蚤
餬口于四方一昨遘禍不天痛枯魚之銜索置身無地
類窮猿之投林謬策定于詞場偶竄名于書局拜恩匹
易待次三秋訖無補于秋毫颯已垂于素髮加以秉性
迂僻與世闊疎留滯天都未暇三書于宰相竭來鄉校
正期一識于荊州豈徒斂版以走下風庶獲執經而趨
文席潘令厭斗筭之役雖懷色養之違顏氏無簞瓢之

憂蓋得依歸之所旣發藥其膏肓之疾復借重于布帛
之言耳受心維日開月益悵遭逢之獨晚故蹇薄之是
宜豈期酸寒流落之蹤曲致哀憐收拾之意茲蓋伏遇
某官人倫標的吾道主盟立心則和而平故雖疎賤而
接以誠意待人則輕以約于至愚陋而收其寸長不勞
假借于先容雅欲振明于公論顧未能執筆輒獎借其
藝文有意讀書謂博涉于墳史是欲一顧而增價端非
兩喜之溢言豈獨推挽以脫于冗賤之中又將誘掖以
堅其問學之志儻容卒業庶幾君子之歸固將終身以

圖國士之報

回賀樞使張少師啓

伏審光膺鳳檢進秉鴻樞釋宣威疆場之勞茂洪化經
綸之業中權增氣外境懾心恭以某官識洞古今望高
夷夏忠烈貫于金石勲業煥乎旂常上眷素隆志渴告
猷于左右外庸旣訖理難循次以褒升用正機衡誕敷
綸綍庶盡攄于遠略遂協濟于中興川陸非遙莫預造
門之列山林待盡尚須奠枕之期慙慶牘之未馳辱榮
緘之先貺感銘之至敷叙奚殫

賀林提學啓

竊審襲承帝渥就領使華董正師儒之聯振明庠序之
教允符公論同極歡悰恭惟某官學極淵源文參經緯
奮揚賢業光闡家聲早闊步于詞林卽橫翔于英毅雍
容學省夙傾矜佩之心留滯泮宮久鬱搢紳之望惟義
所在與時偕行果協僉言寢基鉅用星軺臨遣雖暫寄
于行臺文陛對揚諒已膺于前席某猥緣寒陋特荷眷
憐逖聞用之則行幾欲喜而不寐山川悠遠益睽眉宇
之瞻竿牘敘陳難極心旌之戀靜言抃蹈實倍等夷

代賀提學孫宗博啓

茂膺宸渥出擁使華董正師儒之聯振明庠序之教涓
辰視事揭節宣風伏惟某官學造淵微行成矩矱早飛
英于藝苑遂擢秀于詞場淺履亨塗允膺妙簡談經學
省已模範干宗英將命使臺繫表儀于鄉秀諒令吳越
之地追還鄒魯之風佇列儔功入登華貫某祇官條教
幸託芘輝望眉宇以非遙跂心旌而竊抃

賀王右丞啓

伏審光奉宸恩褒陞右轄出聖神之獨斷符朝野之公

言一札播聞多士交慶嘗謂經遠者實本乎器識垂後
者莫大乎文章宇量宏深于以臨大節而不奪詞章超
邁用能揚偉績之無前嘗歷攷其兼全蓋絕無而僅有
絳侯勃能任大事特病其少文公孫弘號爲名儒或譏
其多詐全才之士固不易得有道之時亦爲難逢間自
負其所長慨每悲于不遇佐佑六經如韓愈未免流離
度越諸子如揚雄終甘寂寞上方講求久逸永寧之計
時乃登用協謀一德之人宜有卓爾不羣之才庶幾曠
然大變其俗恭惟某官氣鍾英偉道極醇深碩學通乎

九流懿德備乎三俊絕世之器識汪乎萬頃之波華國
之文章沛然三峽之水身既兼于數器會復際于千年
自膺密勿之知浸發經綸之蘊便蕃三接清切九遷鳳
閣摘華復見坦明之制烏臺執法共高譽謬之風汲長
孺之忠謂賁育不能奪董仲舒之道雖伊呂無以加亟
召登于禁林繼入承于密命發揮典冊焜耀搢紳蔚矣
邦家之光偉哉廊廟之具果由內相進轄中臺蓋將力
振宏綱大明清論上以告嘉猷于后下以施實德于民
若礪若舟卽正鼎司之重如綸如綍佇聞廷告之頒某

江湖孤蹤口耳末學抗塵走俗自悲流落之餘舐筆和
鉛尚泥平生之好比竊名于英殼實借重于文衡緬懷
贈袞之言妄起彈冠之志然而間關一命荏苒再葦謀
生無負郭之資望祿有倚門之切自笑守株而待兔可
謂迂愚念嘗披霧而覩天實爲幸會逃聞新命尤激懦
衷雌霓連蜷故喜知音之誤辱大鈞坱圠端如播物之
無遺恨阻川途之脩莫預門闌之慶靜言抃蹈倍越等
夷

同賀知紹興府孫尙書啓

伏以聽尚書之履暫別宸廷懷太守之章復開盛府恭
惟某官三朝耆碩多士宗師學貫九流而獨探其精微
文追兩漢而尤高于典冊蚤以人望簡于聖心直道而
行柔莫甘于慕舌見幾而作後何悔于噬臍自詭疾藩
益隆天眷教條惟舊遺愛常新入境抗旌擁歡迎之竹
馬當宁側席行趣召于鋒車某久此周旋悵然離索褰
裳濡足媿明哲之高風緩帶輕裘想蕃宣之樂事方深
慶羨遽辱緘滕感悚之私敘陳罔旣

代賀應漕除直秘閣啓

伏審拜命帝宸登名冊府增寵輝于使節動榮觀于儒
紳伏以某官稟姿粹明應變通敏洵歷光華之寄益據
經濟之才持飛輓之權邦儲已羨紀將明之效天眷有
加膺王綍之褒崇登道山之清切是基持橐之選行奉
賜環之榮某梓里備員久叨輝芘蘭臺寓直獲附英游
抃喜之誠名言罔喻

回李參政啓

久嬰衰疾志在投閒忽徒便藩辭不獲命觸熱遵于遠
道疾驅及于近郊顧惟舊學之荒唐加以頽齡之晚晚

千巖萬壑謾記于昔游十束三鍾第慙于虛受况帑廩一空之後仍邊陲多壘之時宜有傑才以當重寄豈伊名壤可付陳人此蓋恭遇某官惇大有容直方不撓暫去巖廊之邃尤傾海宇之瞻博采衆才陰借齒牙之論曲形高誼首勤竿牘之私獎與過情詞華溢目而某曩獲聞令尹之政今復玷鄭公之鄉條教具存竊詠翦棠之戒風化所繫願觀拔薤之規欣幸之私名言罔既狀

回汪相公遠迎狀

伏以四牡駢駢久涉川途之遠三台兩兩行瞻次舍之光父老駢迎江山改觀恭惟某官望高鼎鉉勲著旂常保佑潛藩成五龍之夾日贊襄清蹕踈八柱以承天久避地于炎荒實簡心于丹展尚艤濟川之舟楫暫適高懷行聞鼓物之雷風亟還舊弼某曩竊依于陶冶茲喜奉于光塵候館已虛尚幸餽牽之未竭前旌俯屆莫諧弩矢之先驅敢謂撝謙首勤華問感銘之切敷敘奚殫

又回鄭侍郎遠迎狀

阻奉晤言恍迷歲月逃聞殊用大慰簪紳正從橐之清

班洗沈僚之永歎伏惟某官才華廊廟之具器業邦家
之光屹若老成表于朝著躋榮武部方有賴于論思將
命朔庭復暫勤于行役顧衰殘之屏處望聲采以非遙
莫遂披瞻過形問勞方際霜風之厲益調鼎飴之和速
返旌壇上符旒展

回知建州魏龍圖狀

魏時自饒州
引嫌易建

輟烏臺之南榻增重蕃宣兼龍閣于西清式昭睠遇拜
恩易地諏日下車伏以某官蘊識高明受才英敏片言
悟主應龍飛天而雲霧來正色立朝猛虎在山而藜藿

茂勉從猥請暫寄承流行卽迂于賜環諒不容于暖席
政途聯事久聞婉畫之優江國避嫌行遂寶鄰之託敢
圖謙德先辱榮函欣感之懷敘陳罔既

回知常州鄭右司狀

伏審輟從宰屬出領侯邦兼榮冊府之清華增重行朝
之屏翰已雅條教第極歡悰伏惟某官學問淵深器資
凝遠蚤擅搢紳之譽寢結冕旒之知冠豸霜臺已想聞
于風采含香蘭省復詳試于猷為旋陞宰士之要途宜
卽從臣之峻列勉從懇請暫寄蕃宣地俯控于江淮政

資備禦人曩經于寇盜尤賴撫綏佇觀報政之成卽有
賜環之寵某分符在遠阻修桑梓之恭視印云初竊聽
袴襦之詠先蒙問勞第極感銘

回知常州陳檢詳狀

奉祠宮之香火病臥漳濱瞻刺史之麾幢喜依河潤塗
詠何來之暮人爭快覩之先伏惟某官學以躬行賢由
世濟踐揚要近盍登論思侍從之聯流落燕閒允蹈用
舍行藏之義比從人望暫領藩符斂大惠于偏州詎容
淹久奉細書之一札佇有褒陞茲以衰遲處于閒散獲

忻懽之託睇鷓首以非遙修桑梓之恭媿魚牋之不敏
首蒙謙眷第極感銘

回知信州夏太博狀

衰晚投閒方養疴于畎畝聖明念舊復假寵于藩維已
見吏民具宜條教載惟江右故號吳頭鑾馭在行尤謹
上流之寄潢池未靜更深南顧之憂曾是疏遲莫知稱
塞伏惟某官義敦久要學富多聞賁以牋題寧論十部
從事副之篇什真是五言長城旣增朽質之光仍託善
鄰之寶庶幾黽勉少追譴訶感媿之私名言罔喻

回汪相公賀正狀

伏以王春肇序人正謹時惟國元臣受天純嘏恭惟某
官厚德表世純誠格天早依日月之光功高弼亮晚避
風波之險身遂燕閒茲薦祉于椒觴佇歸榮于槐鼎方
圖修慶先辱飛緘感頌之誠敷宣罔既

回賀九月望日狀

伏以物華就實序極杪商月魄分中歷占既望恭惟奉
使飭躬謙慤秉志忠嘉順履肅霜之辰茂膺好德之福
遽蒙華翰良極感悚

又

伏以金風既肅民興築圃之功璧月載盈節紀降霜之
候恭惟奉使天姿忠恪使節光華茂對休辰具膺遐福
辱珍題之俯及仰厚德以難忘

謝土物狀

伏以暫偃旌旛獲展郊迎之禮遽頒箱篚分霑庭實之
餘祇沐多儀益知厚意茲爲銘佩曷旣敷陳

又

伏以輶軒授館彌使節之光華聘幣造庭分土毛之珍

厚媿無以報義不獲辭感悚之誠名言曷喻

回謝請大排狀

伏以貢珍遠屆良多衝涉之勤宴豆肆陳敢後獻酬之禮祇修薄具少奉清塵媿率爾以伸辭辱惠然而肯顧更貽尺牘彌激寸心

又

伏以航海奉琛仰使華之勞勩侯邦致館接燕語之從容特枉高軒祇慙非具更蒙謙德曲示華緘荷意良深喻言罔既

代越帥答高麗使副遠迎狀

伏以遠飭使航來從出日肅將貢篚入覲中天欣旌旆之俯臨辱緘滕之遽及瞻迎伊邇慰抃難名

又

伏以祇率邦彝遠輸琛賚風馳使傳俯次郊圻佇披奉于光儀遽先蒙于珍翰其爲欣抃曷旣敷宣

回賀除進大資狀

備位劇藩久慙尸素升華祕殿復玷寵光實不副名榮祇爲媿伏念某學雖泥古智昧知幾壯歲固已無聞投

老安用平時僅能寡過遇事則疎曩強敵之憑陵固羣
心之憂憤欲資調度訖無橫草之勞敢意褻遷叨拜出
綸之寵懇辭莫獲忝冒難勝此蓋伏遇某官稟氣中和
待人輕約念勸功必償名德之重故聞善陰借齒牙之
餘遂致衰遲亦叨擢序移書贊喜辱眷意之相先拜命
懷慙識謬恩之有自其爲感激未易敷陳

回趙提點狀

聯事江湖久託提封之北臥疴衡泌頓疎執訊之儀方
深眉宇之懷忽奉誨函之及馳驅遠道審畫鷁之鼎來

寤寐光儀欣景星之先覩其爲感抃罔旣敷宣

代答鎮江李尚書狀

伏審拜恩易鎮涓日開藩凡竊芘庥同增抃蹈恭惟某
官學蚤窺于聖域望夙著于賢關親逢黼辰之知度越
搢紳之右便蕃三接清切九遷亟登八座之榮久隆睿
眷屢奉一麾之寄彌著休稱報政淮堧而莫遂借留下
車江國而已歌來暮諒履聲之旣識竚環召以遄歸曾
是衰遲以茲睽迖方結心旌之戀復欣眉宇之瞻念慶
牘之未馳辱榮函之遽及悚佩之素敘陳曷殫

書

代侯元功與宰執書

伏念攀附英游蚤辱金蘭之好棲遲田畝遽興露草之悲勉駐殘魂力伸危懼某奮身寒苦遭世盛明晚誤睿知叨陪政路奉身而退訖無橫草之勞尸祿既盈已積負芒之媿更蒙起廢復俾承流敗材難追于人非豐屋復貽于鬼瞰乃嬰疾苦以迫衰殘湯發枯顱謾勞砭劑毒乘沴氣遂逼膏肓念聖代之難逢望台閤而永隔懷恩莫報齋恨無窮尙勉須臾之留以通咫尺之間伏惟

某官懋昭賢業光輔聖時調御至和永肩許國之誼維持極治用廣格天之勲恩旣浹于幽明感難忘于存歿神離形瘁氣索詞窮瞻望門牆無任依戀之至

答晁公爲顯謨書

某頓首臨海使君子幕顯謨執事人至辱惠書一通并先公文集六十卷及雜論變騷等柳子厚所謂如入羣玉之府珪璋琮璜各有列位動心駭目喜可知也且欲求品題于固陋之一言以爲重則執事不能無過也某童外時喜讀書綴文然絕無師承又少貧且弱不能裒

糧重趼問道于四方每聞先生長者之風則服膺而心
師之自東坡先生主斯文之盟則聞先公與黃魯直張
文潛秦少游輩升堂入室分路揚鑣蔚乎其揚袂炳乎
其相輝每文一出人快先覩某嘗窺見一二而恨不預
執鞭之役也每念士生斯時獲游東坡之門如取平于
衡石質疑于龜筮收名定價萬世不易借使後之君子
問學詞采人物之鑒出東坡右者欲加損毫末亦不可
得已況如某之固陋而強聒一言不惟不韙之罪是懼
亦安所措詞哉來書乃謂揚子雲著書使不遇桓譚君

山則十三篇之作遂有醬瓿之厄某竊以爲不然君子
信道篤而自知明初不因人而輕重司馬子長著史記
藏之名山副在京師以待後世君子而雄固有言曰世
不我知無害也後世復有子雲必好之矣則子雲之書
脫不遇君山其遂泯滅而無傳乎至于信道不篤而自
知不明以得一人譽而喜一人毀而慍故左太沖賦三
都以時人未之重也乃欲取決于皇甫謐之一言使不
幸而謚見小異遂棄十年之功于一夫之目豈不謬哉
所以王筠誦郊居賦僅得其音律而沈休文拊掌矜衍

以幸知音之遇亦云陋矣先公信道篤自知明者也固不假人言爲輕重少以文顯初無子雲一時之譏而有東坡器許之重閣下又欲增重于後人之一言不惟某所不敢舉世亦莫之敢也某固以爲執事不能無過也雖然厚意不可虛辱閣下所謂居上位則功業見于時在下位則文章垂于後信然君子處世必居一于斯二者矣達則行道窮則立言其志一也道行則有益于當時立言則有益于後世其爲效亦一也故達者不以功業自多而窮者不以文章自少然後安于義命而無苟

免倖得之心雖然達則文章無聞窮則功業不著如日南而景北晝長而宵短天之賦與殆有定乎疑不得兼也先公名位屈于一時而文采表于萬代豈乘除之理固如是乎然閣下旣以文世其家矣方且力行先公之學而見之事業所以頌揚先公照耀不朽者夫豈資于人哉閣下其勉之不宜某再拜

爲外甥定婚書

合好所以繼後茲重大倫納采而復問名式嚴嘉禮占鳳鳴而協吉贊鴈幣以通勤伏承令姪女幼習婦規頗

著言德容功之美而某小姪某長聞義訓粗免驕奢淫
佚之邪猥緣瓜葛之餘敢卜絲蘿之好矧惟自出久辱
深恩如母存焉固託涓陽之義非吾耦也敢忘齊大之
嫌

代答書

事非人謀夙表刺眉之異理嫌自獻或先坦腹之求念
雖擇對之有緣亦貴因親而出照伏念令姪知名有自
居然裴氏之甥而某姪女幾娘傳業無人藐是中郎之
女來從萬里子爾一身得吾宅相之賢託此宗盟之重

玉臺下聘綽著于風流荆帚贈行敢忘于訓戒

題詞集

卷十

三
吳鼎雯校

昆陵集卷十

